

### लक्ष्य भागीरथी अभियान

प्रदेस म लक्ष्य भागीरथी अभियान म अवइया ग्यारा बछर म करीबन बत्तीस लाख हेक्टेयर रकबा म सिंचई करे के लक्ष्य राखे गेहे। ए अभियान के चलत पहिली चरण म एक लाख हेक्टेयर ले जादा रकबा म सिंचई होय हावय। मुख्यमंत्री ह काली रईपुर म लक्ष्य भागीरथी योजना के एक बछर म राखे गे समारोह बोलत बेरा किहीन कि सिंचई साधन के बाढ़े ले खेती-किसानी के बिकास होही। ओमन यहू किहीन कि प्रधानमंत्री नरेन्द्र मोदी ह बछर दू हजार बाईस तक देस के किसान मन मनके आमदनी ल दुगुना करे के जउन लक्ष्य राखे हे, ओमा छत्तीसगढ़ सरकार के लक्ष्य भागीरथी योजना के बड़का भूमिका रइही।

ए मउका म मुख्यमंत्री ह ए अभियान के सफलता वाले किताब “अभियान लक्ष्य भागीरथी-ए न्यू यार्डस्टिक ऑफ एक्सीलेंस के विमोचन घलो करीन।

### फसल कटाई-अनुमति

राज्य सरकार ह प्रदेस के अइसन किसान जेखन मनके जम्मों फसल के नकसान होय हे या फसल होय के कोनों उम्मीद नइ हे, ओ किसान मन ल खेत मन म रबी फसल लगाय बर फसल के कटाई अउ जोताई खातिर अनुमति दे दे गेहे। ए बारे म मुख्य सचिव विवेक ढांड ह सबो जिला कलेक्टर मन ल परिपत्र जारी कर देहे।

परिपत्र म केहे गेहे कि अइसन किसान जउन रबी फसल लगाय बर फसल कटाई-जोताई करना चाहथे, ओमन पटवारी ल अपन अरजी दे सकत हे। अरजी मिले के बाद ओ जघा के पटवारी ह तीर-तखार के किसान, जनप्रतिनिधि अउ पंच-सरपंच के संग म निरीक्षण कर खरीफ फसल नकसान बारे म जानबा लीहीं। ए दउरान पटवारी डहार ले निरीक्षण करे जघा के फोटूग्राफी अउ वीडियोग्राफी घलो होही।

### दलहल-तिलहन

प्रदेस के किसान मन ल ओन्हारी के खेती बर उत्साह बढ़ाय खातिर बिसेस अभियान चलाय जाही। ए बात मुख्यमंत्री डॉक्टर रमन सिंह ह काली रईपुर म कृषि विभाग के समीक्षा बइठका म किहीन। ओमन अधिकारी मन ले किहीन कि किसान मन ल ओन्हारी फसल बर बिजहा के मिनीकित जरूरत मुताबिक दे जाय। संगे प्रदेस के सूखा परभावित धमतरी अउ महासमुंद जिला म ओन्हारी अउ भूट्टा के फसल बर किसान मन ल जागरूक करे के परयास घलो करे जाय।

बइठका म कृषि मंत्री बृजमोहन अग्रवाल ह बतईन कि केन्द्र सरकार ले ओन्हारी फसल बर चार लाख मिनीकित ले खातिर आग्रह करे गेहे। ओमन बतईन कि जिहां केन्द्र सरकार के ‘बीज ग्राम योजना’ म किसान मन ल ओन्हारी फसल के बीजहा बर साठ परतिसत अनुदान उहें, भूट्टा के बिजहा बर पचास परतिसत अनुदान दे जात हे।

### माओवादी-शिविर ध्वस्त

बीजापुर जिला म सुरक्षा बल मन ह माओवादी मनके एक ठिन शिविर ल ध्वस्त कर देहे। हमर संवाददाता ले मिले जानकारी मुताबिक गंगालूर थाना क्षेत्र ले एसटीएफ अउ जिला पुलिस बल ल मुखबिर ले सूचना मिले रिहीस कि पीडिया म माओवादी मन कैम्प लगाय हावय। इही आधार म सुरक्षा बल मन कार्रवाई करत कैम्प ल ध्वस्त करीन। फेर माओवादी मन जवान मनके पहुंचे के आगूच उहां ले भगा गे रिहीन। बाद म सुरक्षा बल मन ह कैम्प ले दू ठिन जनरेटर, वर्दी, पिट्टू समेत माओवादी जिनीस बरामद करे हे।

### दुर्घटना

प्रदेस म पाछु चोबीस घंटा के दउरान होय आने-आने सड़क दुर्घटना म एक झिन माईलोगिन सरपंच समेत तीन झिन लोगन के मउत होगे। उहें, छै झिन मनखे घायल होगे।

मिले जानकारी के मुताबिक भिलाई म चंद्रा मौर्या अंडर ब्रिज के तीर एक ठिन कार ह दू ठिन फटफटी म सवार म ले दू झिन मनखे ल अपन चपेट म ले लीस, जेमा ले एक झिन लोको पायलेट के मउकाच म मउत होंगे। उहें, दू झिन आने लोको पायलेट के हालत गंभीर बताय जात हे।

ओति, कांकेर जिला के अंतागढ़ म कार के अनते-तनते होके ट्रक ले टकराय के सेती एक झिन माईलोगिन सरंपच के मउत होंगे। उहें, आने दू झिन मनखे ए घटना म घायल होंगे।

### बिजली शिकायत-केन्द्र

छत्तीसगढ़ विद्युत वितरण कंपनी डहार ले देवारी तिहार के दउरान बउरइया मन ल सहूलियत दे खातिर टेम्परेरी सिकईत केन्द्र बनाय गेहे। ए केन्द्र म काली ओन्नीस अक्टूबर तक संज्ञा चार बजे ले रतिहा बारह बजे तक खुल्ला रइही। बउरइया मन बिजली गोल हाय म या फेर कोनों अल्हन म टोल फी नंबर एक नौ एक दू म सिकईत कर सकत हे।

विद्युत विभाग के अधिकारी मन लोगन मन ले आग्रह करे हे कि ओमन बिजली खंभा, ट्रांसफार्मर अउ जउन जघा म बिजली के तार अउ स्वीच बोर्ड रहिथे तेखर ले दुरिहा जघा म पटाखा फोड़य।

### दूरदर्शन

दूरदर्शन केंद्र रायपुर के प्रादेशिक समाचार एकांश डहार ले नैमित्तिक सहायक संपादक, समाचार वाचक, वाचिका अउ सीजी ऑपरेटर के संगेसंग छत्तीसगढ़ के जम्मा जिला म स्ट्रिंगर्स के पैनल नियुक्त करे जाना हे। ए बारे म अउ जादा जानकारी दूरदर्शन केंद्र रायपुर के वेबसाईट डीडी रायपुर डॉट जी ओवी डॉट इन म देखे जा सकत हे। उहें, ए पद मन बर अरजी भेजे के आखरी तारीख अवइया तेरा नवंबर हरय।

### संक्षिप्त समाचार

- मुख्यमंत्री डॉक्टर रमन सिंह के रईपुर स्थित निवास म होवइया साप्ताहिक कारीकरम “जनदर्शन” काली नइ होवय।
- राजभवन म ए बछर देवारी तिहार के मउका म कोनों कारण ले “ओपन हाउस” के आयोजन नइ होही।
- दक्षिण पूर्व मध्य रेलवे के अंतर्गत अवइया सबो रेलवे टेसन म देवारी के दिन यानि काली उन्नीस अक्टूबर के आरक्षण काउंटर ह आधा दिन बर खुले रइही।
- कोरिया जिला के जनकपुर म पुलिस ह आज इक्कीस किलो गांजा के संग एक झिन आरोपी ल गिरफ्तार करे हे।